

Xojon carta-la San Pablo xi ma-ne jò xi kiskii-la xita naxandá-la Cristo xi títsajna Corinto

*Kó tsò Pablo nga síhixat'aà jñà xita naxandá-la
Cristo xi títsajna Corinto*

¹ 'An, Pablo, tìsikasén-nò xojon jè, nga k'oaá s'ín kjòmejèn-la Nainá nga 'an tsibíxáya-na Cristo Jesús. 'An, kò 'ndsè Timoteo tìtsanìkasén-nòjen xojon jè. Tìtsanìhixot'aà-nòjen jñò xi xita naxandá-la Nainá 'mì-nò xi títsajnaà ya naxandá Corinto, kò ngats'iì xita tsjeè-la Cristo xi títsajna kóhokji nangui Acaya. ² Nainá xi Na'èn-ná, kò jè Jesucristo xi otíxoma-ná kàtatsjá-nò kjondaà kò kjoa'nchán ya jjiin inima-nò.

Kó tsò Pablo nga tsjá-la kjondaà Nainá

³ Ndaà kàtayaxkón Nainá xi Na'èn-la ma Jesucristo xi otíxoma-ná. Jè Nainá xi Na'èn-ná ma, tse kjohimatakòn tjín-la it'aà tsaján. Kò jè, kjit'aà nàchrjein síje takoán. ⁴ K'e nga mé kjo'in títsajnajñaá, jè Na'èn-ná síjetakòn-ná mé-ne jñá, k'oaá tìs'ín síjetakoán xinguiáá xi tìkoa kjo'in títsajnajjiin koni s'ín kisìjetakòn-ná Nainá. ⁵ Koni tjín kjo'in xi tse nìkjiaán xi kjoa ts'e Cristo, k'oaá tìs'ín tse kjojetakòn sakó-ná it'aà ts'e Cristo. ⁶ Ngajen, tsà kjo'in tìtsanìkjeiín-jen, kjondaà tsajòn-nò nga s'e-nò kjojetakòn, koa kítjokàjñòò kjo'in. Tsà Nainá síjetakòn-najen, jè-né nga tìkoa

jñò s'e-nò kjojetakòn, koa kichikjoa ko-nò kjo'in xi jin tisanikjeiin-jen. ⁷ Tjin kixi kjoa xi chiana-lajen it'aa tsajon. Tijin-najen, koni s'in tihokot'aa-nò kjo'in xi tisanikjeiin-jen, k'oa tis'in okot'aa-nò kjojetakòn xi tin-najen.

⁸ Jñò 'ndsè ko tichjaá, mejèn-najen nga katasijin-nò kjo'in xi kis'e-najen jan nangui Asia. Tse jchan kjo'in kinikjeiin-jen. Jyeé mi ti kii kichikjoako-najen skanda mi ti kii bixon-najen tsà kitsajnakon isa-jen. ⁹ K'oaá s'in komà-najen nga jyeé-la tjinè-la nga kiyá-jen. K'oaá s'in komat'in-jen mé-ne nga isa ndaà kjót'aa takòn-najen Nainá xi ma-la síkjaáya-la mik'en, nga mi tà yijo-najen kjót'aa takòn-jen. ¹⁰ Nga jyeé kjomeé k'en-jen, tanga Nainá tsasiko-najen nga kisikatojin-najen kjo'in ko táko sikatojin-isa-najen kjo'in. Ko k'oaá s'in kjit'aa takòn-jen nga jè sikatojin isa-najen nitá mé kjoa-ne. ¹¹ Jñò, mochjeén-né nga sichjat'aa-najen nga kinókjoat'aa-la Nainá it'aa tsajen mé-ne nga isa kjin koma-ne xita xi kichjat'aa-la Nainá, tikoáá kjin koma xita xi tsjá-la kjondaà Nainá koni s'in machikon-t'in-jen.

Mé-ne mikii kii-ne Pablo jan Corinto

¹² Tjin jngò kjoa nga ndaà nikitsajna-jen yijo-najen. K'oaá s'in beè-lajen takòn-jen nga it'aa ts'e Nainá nchrobá-ne nga tsjeé ko kixi tihonguiko-jen yijo-najen i isò'nde, ko jè tjina ítòn it'aa tsajon. Mitsà kjoachjine-la xi taxki xita nga ko'nè-jen, kjondaà-la Nainá-né. ¹³ Mitsà kjeii kjoa nga titsachjii-nòjen, ta jè-né nga kixkejñòò ko kjoas'en-jiin-nò koni tsò 'én xi tjit'aa xojon jè. K'oaá

s'ín majngoò takoàn nga nguì ndaà kjiya-nò ¹⁴ koni s'ín jye kjòchiya chiba-nò nga tsja kàtama-nò it'aà tsajen kò nga tikoà tsjaá koma-najen it'aà tsajòn k'e nga kjoíí ìjngoò k'a Jesucristo xi otíxoma-ná.

¹⁵ 'An, jyeé ndaà tíjngoò takoàn it'aà ts'e kjoa koi, k'oaá ma-ne nga k'oas'ín kiskoòsòn-là nga jò k'a kjíkon-nò mé-ne jñò, jò kjondaà sakò-nò. [Tanga mì k'oaá s'ín tsitasòn.] ¹⁶ K'oaá s'ín kisikítsjeèn, k'e nga kiaà nangui Macedonia nga ya jahato ítjòn-nò. Tjín-nè nga kjoahato ìjngoò k'a-nò k'e nga kjinchrobà-na mé-ne jñò koma sichját'aà-ná nga kjián nangui Judea. ¹⁷ K'e nga k'oas'ín kiskoòsòn-là, ¿a k'oaá s'ín kinikítsjeèn nga 'an, tisiskáko-nò? Majìn, nga mì k'oaá s'ín s'iaàn koni s'ín xi taxkì xitá isò'nde. Mìtsà ítjòn xan-nò: “Koma-né”, kò tik'e-ne ìjngoò k'a xan-nò: “Mìkì koma.” ¹⁸ Tíbeè Nainá; 'én kixìí xi kixan-nò, ngajen, mì k'oaá s'ín nokjoà-jen nga bixón-jen: “Jon, koma-né”, kò “Mìkì koma.” ¹⁹ Timoteo, Silvano kò 'an, k'oaá s'ín nokjoà-yajiìn-nòjen it'aà ts'e 'én-là Jesucristo xi ki'ndí-là Nainá. Tsjìn-là 'én xi tsò jon kò majìn. Nainá jngoò k'a síkitasòn it'aà ts'e Cristo nga tsò: “Jon, koma-né.” ²⁰ Ngats'ì 'én xi chja Nainá koni s'ín tsjá tso'ba, it'aà ts'e Cristo bitasòn yije-né. Nga jè Cristo xi tsò “koma-né”. Kò it'aà ts'e Cristo, jñá bixón-ná: “K'oas'ín kàtama”, mé-ne jeya kíjna-ne Nainá. ²¹ Jè Nainá, xi síkixiyandaà-ná nga jè titsajnakoaá Cristo [xi xó jaàjìn-ne Nainá], tikoá jñá xó jaàjìn-ná Nainá. ²² Kò tijè-ne Nainá xi tsibít'aà chiba-ná koni jngoò sello; kisikíjnajiìn inìma-ná jè Inìma Tsjeè-là xi tjoé ítjòn-ná nga kixì kjoa nga tikoà tjoé yije-ná kjondaà xi tjíndaà-là nga

tsjá-ná.

²³ Tíkotsejèn Nainá, jè tíbeè iníma-na, mé-ne kj'eè kii fi-na Corinto koni s'ín tíjín-na; koií kjoa-la, majín-na nga 'on koma-la iníma-nò nga 'én ts'en kichjàkò-nò. ²⁴ Ngajen, majín-nòjen nga ngajen, kjo'ńó kotìxoma-nòjen it'aà ts'e 'én xi mokjeíin-nò. Ta saá nìchját'aà-nòjen mé-ne nga s'e-nò kjotsja nga kixi tìtsajnaà koni s'ín mokjeíin-nò.

2

¹ K'oaá ma-ne nga k'oas'ín kiskoòsòn-la nga mì tì kii kiikon-nò. Majín-na nga ba kìtsajnaà. ² Tanga tsà 'an, ba síkìtsajna-nò, nga koma iskan, mì tì yá tìjín-ne xi sùtsjako-na, nga jńò, jyeé ba tìtsajnaà. ³ Koií xá jye kiskii jngoò-nò xojon, mé-ne k'e nga kijchokon ijngoò k'a-nò nga mì ba síkíjna-ná nga mochjeén-né nga jńò sùtsjako-ná. Nga k'oaá s'ín tíjngoò takoàn, 'an, matsja-na tìkoo jńò, matsjaá-nò. ⁴ K'e nga k'oas'ín kiskii-nò, ndaà jchán kokájno-la iníma-na, baá kis'e-na skanda ndáxkoaàn tsibíxteèn. Tanga 'an mìtsà koi xá kiskii-nò nga kàtaba-nò. Jè-né nga jchaa nga 'ńó matsjake-nò.

Kó kitsò 'én xi kùichja Pablo it'aà ts'e xita xi tsohótsji jé

⁵ Jè xita xi tsohótsji jé, mìtsà ta 'an xi ba kisíkíjna-na, mejèn tsà ba kisíkìtsajna ngats'ìi xita naxandá-la Cristo. Tà k'oaá xan-nò nga mì koto chiba-la koni s'ín tìxan-nò. ⁶ Nga kjìn ma-nò xi tsibìnè-là kjo'in jè xita jè; jyeé ndaà tìjín, ta koma-ne. ⁷ I'ndeji, jè xi s'een nga sijchàat'aà-là jé-la; sijetakòn xita jè, mé-ne nga mì kjoba

kijájìin-ne. ⁸ K'oaá ma-ne nga bìtsi'bà-nò nga ndaà jchibàya-nò nga ìjngoò k'a tìtsjacha xìtá jè. ⁹ Tìkoá koií xá kiskii-nò ìt'aà ts'e kjoa koi, mejèn-na skot'aà-nò, a kixii kjoa nga ma-nò nìkitasòn yije. ¹⁰ Jè xìtá xi jñò nìjchàat'aà-la jé-la, tìkoá 'an sùjchàat'aà-la. Tsà mochjeén-né nga 'an sùjchàat'aà-la xìtá jè, 'an jyeé kisìjchàat'aà-la xi kjondaà tsajòn kò tìbeè Cristo. ¹¹ Mé-ne jè xìtá neíi mìkii koma jè sùikijne-ná, nga jyeé ndaà 'yaá kjoamaña-la kós'ín síxá.

Kó komà-la Pablo nga mìkii kisatiikjoò Tito ján Troas

¹² K'e nga ijchoa ján naxandá Troas, nga kichjàya 'én ndaà-la Nainá xi kjoa ts'e Cristo, ìt'aà ts'e Na'èn-ná kitáx'a'nde-na nga kisixákoáa 'én ndaà-la Nainá. ¹³ Tanga mìkii ndaà kis'e-la inìma-na nga mìkii kiskaàjñà jè 'ndsé Tito. K'oaá komà-ne kisìkìtsajna jñà xìtá xi ya ì'nde-la, ìkjoàn kiaà ján nangui Macedonia.

Mé kjoa-ne nga jè Pablo tsjá-la kjondaà Nainá

¹⁴ Ndaà chjí-la Nainá nga ìt'aà ts'e Cristo fìko-najen k'e nga okó-lajen jñà xìtá isò'nde nga jye kisìkijne. Ìt'aà tsajen k'oaá s'ín obìsòn kjohìtsjeèn-la Nainá xi kòs'ín ngaya-la koni jngoò jta-la tsojmì xi 'ñó ndaà jne, mé-ne nga skoe-ne jñà xìtá nìtá ñánda-ne nga títsajna. ¹⁵ Ìt'aà tsajen k'oaá s'ín ngaya-la koni nì'ndi-la chrjóngó-la Nainá, k'e nga jè Cristo tsját'aà-la Nainá. K'oaá s'ín bijchókajìin-la jñà xìtá xi bitjokàjìin kjo'in kò xìtá xi chija. ¹⁶ Ìt'aà ts'e jñà xìtá xi chija, [k'e nga beè-najen nga bènojmiya-jen 'én-la Nainá], k'oaá s'ín ch'o jne-la koni jngoò jta xi sík'en-ná.

Tanga jñà x̄ita xi bitjokàjìin kjo'in, k'oaá s'ín ndaà jne-la koni jngoò jta xi síkíjnakon-ná. It'aà ts'e xá koi, nijngoò x̄ita chíkjoa-la nga síkitasòn xi ta kjohítsjeèn ts'e. ¹⁷ Ngajen, mìkii k'oas'ín 'nè-jen koni s'ín x̄ita xi kj'eii xi chjaya 'én-la Nainá nga ton síkijne. Ngajen, 'én kixii nokjoà-jen. Nainá tibeè-ne nga jè kisikasén-najen kò nga ñó ts'e Cristo-né nga nokjoàya-jen, nga jè Cristo titsajnakò-jen.

3

Xá-la Nainá xi kjoa xitse

¹ K'e nga k'oa'mì-nòjen kjoa koi, ¿a bìts'ia jngoò k'a-jen nga ndaà nìkítsajna-jen yijo-najen? Jñò, ¿a k'oaá s'ín nìkítsjeèn nga mìkii tjí'nde-na nga ma sixá tsà tsjìn-na xojon xi jñò k'oi-ná, o xi kj'eii x̄ita tsjá-na koni s'ín síjé x̄ita xi kj'eii? ² Majìn, jñò sobà-nò xi xojon-najen ma xi tíjìin ijìin inima-najen. Ngats'ii x̄ita beè-né koa bíxkejìin-né. ³ K'oaá s'ín ndaà 'ya-jen nga jñò-nò xi koni xojon-la Cristo xi it'aà tsajen kitjei. Jngoò xojon carta xi mìtsà tinta kitjei-ne; koó Inima Tsjeè-la Nainá xi tíjnakon kitjei-ne; mìtsà ndajo kitjeit'aà; yaá kitjeit'aà yijo inima-la x̄ita.

⁴ Kjoa koi, k'oaá s'ín makixiya nga it'aà ts'e Cristo mokjeiín-najen it'aà ts'e Nainá. ⁵ Xi ta nga ñó tsajen tsjìn-najen kjohítsjeèn mé xi s'en-jen. Tanga jè Nainá tsjá-najen kjohítsjeèn k'e nga mé xi 'nè-jen. ⁶ Jè Nainá tsjá-najen kjohítsjeèn nga chí'nda-la ma-jen mé-ne nga koma kìnókjoaya-najen it'aà ts'e kjondaà xitse xi Nainá tsbíndaàjìin-kò jñà x̄ita. Mìtsà kjoa ts'e kjotíxoma xi xojon tíjt'aà, ts'ée Inima Tsjeè-la Nainá. Jè kjoa

xi ts'e k̄jotíxoma sík'en-ná nga nguixk̄on Nainá, t̄anga jè In̄ima Tsjeè-la Nainá síkíjnakon-ná.

⁷ Jè k̄jotíxoma xi kitjoé-la Moisés xi ndajo kitjeit'aà, k̄joa biyaà j'ìiko. T̄anga k'e nga sa kitjoé ítjòn-la k̄jotíxoma jè, k'oaá s'ín ki'ya-la k̄joa jeya-la Nainá. Jè Moisés, k'e nga j'ii-ne nga kii m̄jìn-jno nindoò, j̄nà x̄ita Israel mìkii komà kiskoò'an Moisés nga 'ño ote ni'ín k̄ji isén-la; t̄anga xi komà iskan, chaán kichijà xi ote k̄ji isén-la. Tsà k'oaá s'ín kis'e-la k̄joajeya, jè k̄joa xi t̄jínè-la nga ch̄ija, ⁸ isa jeya t̄jín k̄jondaà x̄itse xi tsjá-ná Nainá k'e nga tsjá-ná In̄ima Tsjeè-la. ⁹ Nga jeya j'ii jè k̄jotíxoma xi k̄joa biyaà tsibínè-ná, isaá 'ño jeya k̄itasòn 'én xi nokjoàya-jen nga x̄ita kixi síkítsajna-ná Nainá. ¹⁰ Nas'ín 'ño kis'e-la k̄joa jeya jè k̄jotíxoma xi jye tsato, t̄anga mìkii mangásòn-ko jè k̄joajeya xi t̄jín-la k̄jondaà x̄itse; isaá 'ño jeya t̄jna. ¹¹ Tsà jè k̄joa xi tíchijangui kis'e-la k̄joa jeya, isaá jeya t̄jín k̄joa x̄itse xi mì t̄i kii ch̄ija-ne n̄ita kjé-ne.

¹² Nga t̄jingoò takòn-jen nga titsachiñá-lajen k̄joa koi, k'oaá ma-ne nga mìkii masobà-najen nga nokjoá-jen. ¹³ M̄itsà k'oas'ín 'nè-jen koni kis'iin Moisés nga nikje tsibíjtsa isén-la, mé-ne nga j̄nà x̄ita Israel mìkii komà kiskoò'an-ne nga jye tíchijangui xi ote k̄ji isén-la. ¹⁴ T̄anga j̄nà x̄ita Israel k̄jótájaaj̄in k̄johítsjeèn-la. Skanda nachrjein i'ndeij, k'e nga bíxkej̄in Xoj̄on-la Nainá xi t̄jít'aà k̄joa jchínga xi tsibíndaaj̄in-ko x̄ita, tákó k'oaá s'ín ma-la koni tsà nikje xoba kijtsa k̄johítsjeèn-la. Ta jngoó it'aà ts'e Cristo koma t̄jáxin nikje jè. ¹⁵ Skanda nachrjein i'ndeij, j̄nà x̄ita Israel, k'e nga bíxkej̄in xoj̄on xi kiskii Moisés, tákó k'oaá s'ín ma-la koni

tsà nikje xoba tíjtsa'ma kjohítsjeèn-la. ¹⁶ Tanga k'e nga jngoò xita síkjahatjìya-la kjohítsjeèn-la nga fit'aà-la Na'èn-ná xi otíxoma-ná, tjáxìn-la nikje xoba xi tíjtsa'ma kjohítsjeèn-la. ¹⁷ Nga jè Na'èn-ná, jè sobà-né xi Inima Tsjeè-la Nainá. Ya ñánda tíjna Inima-la Na'èn-ná, jñà xita títsajnadejí-né kjoa ts'e kjotíxoma. ¹⁸ Ngats'iaá jñá mì tì nikje xoba tíjtsa'ma-ne kjohítsjeèn-ná. It'aà tsaján k'oaá s'ín ngayala koni jngoò chítsín xi ma chítsejèn-yá xi okó kjoa jeyala Na'èn-ná. Kjit'aà nachrjein isa jeya tíhotsejèn koni kji Na'èn-ná nga jè Inima Tsjeè-la tísíkatjìya-ná.

4

Kó s'ín síhiseèn-ná jè 'én ndaà-la Nainá xi kjoa ts'e Cristo

¹ Koií kjoa-la ngajen, mìkìl mahindaà inima-najen nga jè Na'èn-ná kjòhimakeè-najen nga xá ts'e kisingatsja-najen. ² Jyeé kichjaàxìn-jen jñà kjoa ch'o xi tjí'ma, xi sísobà-najen; mìkìl chonachan-jen, nì mìkìl nìkijatjìya-lajen 'én-la Nainá. Nguì 'én kixì bènojímí-jen, mejèn-najen nga nguixkon Nainá ngats'ìl xita kàteèxkon kjohítsjeèn-najen kós'ín 'nè-jen. ³ Jè 'én ndaà-la Nainá xi kjoa ts'e Cristo xi nokjoàya-jen, jñà xita xi ya tíchijajìl kjoa ts'e jé-la, ta jñà-né xi tíjtsa'ma kjohítsjeèn-la nga mìkìl fiya-la. ⁴ Jè xita nejí xi tíhotíxoma-la isò'nde nachrjein i'ndeí, xi kòs'ín tíjna koni tsà nainá, jé bíchjoà xkon jñà xita xi mìkìl mokjeíin-la it'aà ts'e Cristo; nga jè bíjñò kjohítsjeèn-la, mé-ne nga mìkìl skoe-ne kjoahiseèn-la 'én ndaà-la Nainá xi kjoa ts'e Cristo

xi 'ñó jeya tǐjna, nga jè Cristo xi okó kó kji xi nguì jè sobà Nainá. ⁵ Ngajen, mìtsà tà ìt'aà tsajen nokjoà-jen k'e nga bènojmiya-jen 'én-la Nainá; ìt'aà ts'eé Jesucristo nokjoà-jen nga jè xi otíxoma-ná. Ngajen, tà chǐ'ndaá ma-jen nga ngajen nìxá-nòjen, koií-né nga matsjacha-jen Jesús. ⁶ Nainá, jè xi kitsò nga jè ni'ín kàtasíhiseèn ì'nde ñánda jǐnò choòn, tǐjè-né xi kisíhiseèn jǐin iníma-najen, mé-ne jǐnà xǐtǎ xi kǐ'eí kóhiseèn-la nga skoexkon kjoa jeya-la Nainá koni s'ín 'ya-la ts'e Cristo.

Mé-ne tǐjngòò-ne takoán nas'ín kjo'in tǐtsǎnikjiaán

⁷ Kjondaà jè xi 'ñó tse chǐí-la, yaá tǐjǐin yijo-najen. Tanga yijo-najen k'oaá s'ín ngaya-la koni tǐjǐ ni'nde. Jè Nainá k'oaá s'ín kis'ìin mé-ne nga 'ya-la nga jè nga'ñó xi 'ñó ndaà tísíxǎjǐin yijo-najen, ìt'aà ts'e Nainá nchrobá-ne; mìtsà ìt'aà tsajen nchrobá-ne. ⁸ 'Ñó kǐin ma-ne kjoa xi tǐjǐn-najen, tanga maá kǐtjokǎjǐin-jen. Tǐjǐn kjoa xi makájno-najen, tanga mìkǐì mahindaà-jen. ⁹ Fǐtǐjǐngui kondraá-najen xǐtǎ, tanga Nainá mìkǐì tsjeiǐn takòn-najen; jǐnà xǐtǎ beètòòn-najen, tanga mìkǐì chíkjoa-la nga síkjesòn-najen. ¹⁰ Nǐtǎ ñánda-ne nga onguí-jen, kǐit'aà nǎchrjein mejèn-la síik'en-najen xǐtǎ koni s'ín komàt'in Jesús; tanga jè Nainá, jè xi mejèn-la nga ìt'aà tsajen kàta'ya-la nga jè Jesús xi tísíkǐjnakon-najen. ¹¹ Ngajen xi tǐtsǎjnakon-jen, kǐit'aà nǎchrjein tǐjnat'aà chraña-najen kjoabiyaá xi jè ngatǐjǐ-la Jesús, mé-ne jè yijo-najen xi ma biyaá jcha-la kjoabinachon ts'e Jesús. ¹² Ngajen, kjo'iín tǐtsǎnikjeiǐn-jen skanda mejèn-la xǐtǎ síik'en-najen, tanga jǐnò kjoabinachon tísakó-nò.

13 K'oaá s'ín tíchja Xojon-la Nainá nga tsò: “Mokjeiín-na k'oaá ma-ne nga kichjà.” Ngajen, k'oaá tís'ín tjín inima-najen it'aà ts'e 'én xi mokjeiín-najen, k'oaá ma-ne nga nokjoá-jen. 14 Jè Nainá xi kisikjaáya-la Na'èn-ná Jesús it'aà ts'e kjoabiyaà, 'ya-nájen nga tikoáá kijchò nachrjein nga siikjaáya-najen koni s'ín jaáya-la Jesús. Ikjoàn ngats'iaá kjikó-ná ya nguixkon Nainá. 15 Ngats'ii kjoa koi, kjondaà tsajòn-nò, mé-ne isa kjìn koma-ne xita xi tjoé-la kjondaà-la Nainá, nga tikoá isa jeya kína Nainá nga kjìn ma xita xi tsjá-la kjondaà.

16 K'oaá ma-ne mìkii mahindaà inima-najen; kixii kjoa yijo-najen tífehenguí-né; tanga Nainá, nachrjein nchijòn tísixitseyá inima-najen. 17 Jè kjo'in xi nìkjeiín-jen i isò'nde, tà chibaá tjín. Tà jngòò tò oto. Tanga yaá sakó-najen kjondaà xi isa jeya tjín xi mìkii fehet'aà nita kjé-ne. 18 Nga mìtsà jña chitsejèn-lajen kjoa xi tjín isò'nde xi tsejèn, jña chitsejèn-lajen xi mìkii tsejèn xi ts'e Nainá. Kjoa xi tíma i isò'nde, kjoehet'aà-né, tanga jña kjoa xi mìkii tsejèn, mìkii kjoehet'aà nita kjé-ne.

5

Ni'ya xi tjindaà-la Nainá ján ngajmii

1 Yijo-ná k'oaá s'ín गया-la koni ni'ya xi tjín i it'aà nangui xi chiba nachrjein ma-la nga bixòña. Tsà kixoña ni'ya jè, Nainá tjindaà jngòò-la ni'ya ján ngajmii, xi tjina nita kjé-ne, nga mìtsà tsja xita kisindaà-ne. 2 K'oaá ma-ne nga imaá fahatse-la inima-ná i isò'nde nga jè xi mejèn-ná nga niton kitsajnyaa ni'ya-ná ján ngajmii. 3 Nas'ín sijna

yijo-ná xi tsjach'á ì'ndeì, Nainá tsjá ìjngoò-ná xi yijo xitse. Jè inìma-ná mìtsà chija, yijo xitseé koma. ⁴ K'e nga tákó tíjnakon yijo-ná koni jngoò ni'ya xi ma bixòña, ìmaá fahatse-ná, maba-ná, mìkì tsò takoán nga ìkíjna ni'ya-ná. Majìn-ná nga tjáxìn-ná ni'ya jè, jè xi mejèn-ná nga kàtaxitseyá yijo-ná mé-ne nga yijo-ná xi ma biyaa jngoò k'áa jchija nga jè kjoabinachon sükijne-la. ⁵ Jè Nainá xi xó k'oas'ín tsibíndaà-ná kò kitsjaà-ná Inìma Tsjeè-la mé-ne tíkixi-ne kjoa nga iskan tsjá yije-ná koni s'ín kitsjaà tso'ba.

⁶ Kjit'aá nachrjein k'oas'ín tíjngoò takoán it'aà ts'e Nainá kò k'oaá s'ín tíjìn-ná, k'e nga tákó tíjnakon yijo-ná ì it'aà nangui koni jngoò ni'ya ñánda titsajnaá, kjìin titsajna-lá ni'ya-la Na'èn-ná ján ngajmì. ⁷ K'oaá s'ín titsanjchá yijo-ná koni s'ín mokjeín-ná it'aà ts'e Nainá, mì k'oaá s'ín mochjeén nga kos'ín sjchá yijo-ná koni s'ín beè xkoaán. ⁸ Tíjngoò takoán it'aà ts'e Nainá, isáa-la ndaà tjín tsà sükíjnaá yijo-ná, mé-ne nga ján kitsajnakoaá Na'èn-ná ngajmì. ⁹ Koií kjoa-la nga ndaà sikitasoán koni s'ín sasén-la Na'èn-ná, a ì titsajnaá it'aà nangui a xi ján titsajnaá ján ngajmì. ¹⁰ Mochjeén-né nga ngats'iaá kùjchoaá nguixkon ñánda tíhotíxoma Cristo nga k'oi-lá kindá nga jngoò jngoaa; tjoé-ná chjí-ná mé kjoa xi ki'né nga titsajnaá isò'nde, a ndaà ki'né, o xi ch'o ki'né.

'Én xi tsjá kjoa'nchán it'aà ts'e Nainá

¹¹ Nga yaxkón-jen Nainá koni s'ín ok'in-la, k'oaá ma-ne bènojímí-lajen xita xi kj'eí, mé-ne kòkjeín-la it'aà ts'e Cristo. Nga nguixkon Nainá ndaà beèxkon-najen nga ndaà 'nè-jen, 'an

k'oaá tís'ín mejèn-na nga tikoá jñò jyeé ndaà yaxkon-nájen. ¹² Mítsà 'mì-nòjen nga tìjin ndaà nìkítsajna-nájen yijo-najen tanga jè xi mejèn-najen nga tsja kátama-nò it'aà tsajen, mé-ne koma kìnókjoa-là jñà xita xi tijnà ndaà síkítsajna-ne yijo-la koni s'ín tsejèn-la, tanga jè inima-la mìkì ndaà síkinda. ¹³ Tsà ská-najen, koi-né nga Nainá nixá-lajen, tsà ndaà tìjn kjohítsjeèn-najen, kjondaà tsajòn-nò nga jñò nixá-nòjen. ¹⁴ Jè kjoatjòcha-la Cristo jè kitsobà'ñó-najen nga ma fiko-najen koni s'ín mejèn-la, k'oaá tìjn kjohítsjeèn xi kjòchiya-najen nga jngoò xita k'en ngajo-la ngats'ìi xita xi tìjn isò'nde, k'oaá komà-ne nga ngats'ìi xita k'en. ¹⁵ Jè Cristo k'en ngajo-la ngats'ìi xita xi tìjn isò'nde, mé-ne jñà xita xi títsajnakon mì tì k'oaá s'ín sùjchá-ne yijo-la koni s'ín mejèn-la yijo-la. K'oaá s'ín sùjchá yijo-la koni s'ín mejèn-la Cristo nga jè k'en ngajo-la koá jaáya-la it'aà ts'e kjoabiyaá.

¹⁶ I'ndeì mì tì kii k'oas'ín nìkítsjeèn-najen it'aà ts'e xita xi kje'í kós'ín tsejèn, kó kjoàn, koni s'ín s'ín jñà xita isò'nde. K'e nga sa ítjòn k'oaá s'ín kinikítsjeèn-jen, jè Cristo, tsà taxkì xita isò'nde-nè. Tanga i'ndeì mì tì k'oaá s'ín nìkítsjeèn-najen. ¹⁷ Jngoò xita, k'e nga Cristo tìjnako, xita xitse-né it'aà ts'e Nainá. Jè kjoa jchínga jyeé tsato, jyeé kjòxitseya yije.

¹⁸ Ngats'ìi kjoa koi it'aà ts'e Nainá nchrobá-ne, nga it'aà ts'e Cristo kichibàndaà-ná ko Nainá. Ko jè Nainá kitsjaà-najen xá nga koma kénajmí-jen kós'ín kjoóndaà-ne xita ko Nainá. ¹⁹ It'aà ts'e Cristo kisixá Nainá nga kisìkjoóndaà-ne xita isò'nde. Mì tì

kii kinda kis'iin-ne jé-la jñà xita. Ko kitsjaà-najen xá nga bènojmi-jen kós'in ma nga chibàndaà-ná ko Nainá. ²⁰ K'oaá ma-ne ngajen sikasén-najen Cristo nga nokjoà ngajo-lajen. K'oaá ngaya-la koni tsà jè Nainá tíbitsi'ba-nò. It'aà ts'e Cristo bìtsi'bà-nòjen: jchibàndaàko-nò Nainá. ²¹ Cristo, mìtsà jé tsohótsji; tanga xi kjondaà tsaján, Nainá, jé tsohónè yije-la ngats'iì jé xi tjin isò'nde, mé-ne it'aà ts'e Cristo, xita kixi komaá nga jè Nainá sùkixiya-ná.

6

¹ Ngajen, xi Nainá nixát'aà-lajen, bítsi'ba-nòjen, kjondaà xi tsjá-nò Nainá, ndaà tikjeén. ² Nga jè Nainá, k'oaá tsò:

Ki'nchrè-lè k'e nga ndaà chiba-la kjòchjeén-lè
kjondaà-na,
tsohósikoó-lè, jè nàchrjein k'e nga tíchiñá-la nga
kitjojiin kjo'in.

I'ndeì, jñò, ndaà tiná'yaà. Jyeé ijchò nàchrjein ts'e
kjondaà-la Nainá nga kitjokàjñòò kjo'in.

³ Nímé kjoa xi ch'o 'nè-jen xi síkits'ón-jìin-la xita
xi kj'eíí, mé-ne jè xá-la Nainá xi jin titsa 'nè-jen mì
yá xi ch'o kichjajno-la. ⁴ Nita mé kjoa xi 'nè-jen,
ndaá onguíko-jen yijo-najen mé-ne jñà xita
skoe-ne nga chi'nda-la Nainá 'mì-najen, nga 'ñó
tjin-najen kjoatsetakòn, 'ñó ndaà chikjoako-najen
kjoa ts'e kjo'in, ko tíchijat'aà-najen mé tsojmì
xi kochjeén-najen, koa chjá tíma-najen kjoa
xi tíhotojiin-jen, ⁵ nga tísat'é-najen, nga ndayá
tínikjas'en-najen, nga ngajen binchaàtsji-lajen
kjoasii naxandá, nga 'ñó nixá-jen, ko mìkii
tsafé-jen, skanda bìtsajna kjinchrá-nájen. ⁶ Tanga
ngui tsjeé titsanìjchá-jen yijo-najen; ndaá

machiya-najen nita mé kjoa-ne; tjín-najen kjoatsetakòn kò kjondaà it'aà ts'e xita; kò jè Inima Tsjeè-la Nainá tísíxájin inima-najen; kò ngui kóó inima-najen nga tjín-najen kjoatjòcha. ⁷ Bènojmi-jen 'én xi kixi tjín. Tjín-najen nga'ñó-la Nainá. Jñà kjoa kixi xi 'nè-jen, k'oaá ngaya-la koni jñà kicha xi kò ngaskón kò kixi mochjeén. ⁸ Tjín xita xi beèxkón-najen, tikoá tjín xi mìkì beèxkón-najen. Sakoáá ndaà chja it'aà tsajen, sakoáá majin. Tjín i'nga xi xita ndiso tsò-najen tanga ngajen 'én kixi nokjoá-jen. ⁹ Tjín i'nga xi k'oas'ín síkò-najen koni tsà mìkì beèxkon-najen, tanga tjín xi beèxkon-najen. K'oaá s'ín beèhikon-najen koni tsà jyeé k'en-jen, tanga titsajnakon-nájen. Tsja-najen kjo'in jñà xita tanga mìkì biyaa-jen. ¹⁰ K'oaá s'ín ko'an-najen koni tsà ba tjín-najen, tanga ngajen tsja tjín-najen. Tsò-najen nga xita ima-né, tanga it'aà tsajen, kjin jchán xita tísakó-la kjondaà ts'e inima-la. Nime xi tjín-najen, tanga nguixkon Nainá, tjín yijeé-najen nita mé-ne.

¹¹ Jñò 'ndseé xi Corinto tsajòn, jyeé kinokjoà kixi-nòjen; ngui kóó inima-najen matsjacha-nòjen. ¹² Ngajen, mìtsà bìxkon-nòjen kó tsò kjohítsjeèn-la inima-najen, jñò-nó xi bìxkòon kó tsò kjohítsjeèn-la inima-nò. ¹³ K'oaá s'ín chjà-nò koni tsà ixti-na xan-nò, jñò, k'oaá tís'ín t'een koni s'ín 'nè-jen, nga kò inima-nò titsjacha-nájen.

Tinchat'aàxin-là kjoa ts'e jé

¹⁴ Jñò, xi mokjeiin-nò it'aà ts'e Cristo, kì jñà xita xi mìkì mokjeiin-la nìngàsòn-kò kjohítsjeèn-nò. ¿A komaá kongàsòn-kò jngòò xita xi tjín-la okixi kò

jngoò xi tsjìn-la òkixi-la Nainá? ¿A komaá ya kitsajnajñaá ñánda jñò choòn nga tjín kjoa iseèn?

¹⁵ ¿A komaá ndaà kjiko xíkjin, jè Cristo ko xita neí? Tikoáá mikiì koma ndaà kjiko xíkjin jngoò xita xi mokjeiín-la it'aà ts'e Cristo ko jngoò xi mikiì mokjeiín-la. ¹⁶ Mikiì koma ya sijnyaya ni'ya ingo-la Nainá jña xkósòn xi nainá tsò-la xita. Nga jña-ná xi 'mì-ná ni'ya ingo-la Nainá xi tjínakon. Koni s'ín kitsò Nainá it'aà ts'e xita xi mokjeiín-la, tsò-né:

'An, yaá kótijnakoaa naxandá-na, tikoáá yaá kojmejiín-la.

'An-ná xi Nainá kitso-na koa jña koma xita naxandá-na.

¹⁷ Nainá k'oaá kitsò nga kiichjajiín-la xita naxandá-la:

Tìtjokàjiín-là jña xita xi mikiì mokjeiín-la it'aà ts'an,

koa tìnchat'aàxìn-là.

Nimé kjoa chingàjñò xi tjé tjín nga nguixkoaèn, mé-ne nga 'an koma skoétjò-nò.

¹⁸ 'An-ná xi skoétjò-nò koni jngoò Na'èn, jñò koma ndí ixti x'in-na ko ndí ixti íchjín-na, k'oaá tsò Na'èn-ná xi ta jè tajngoò xi 'ñó tse nga'ñó tjín-la.

7

¹ Jñò ndí 'ndsè xi matsjake-nò, k'oaá tjín kjondaà xi tsjá-ná Nainá koni s'ín kitsjaà tso'ba. K'oaá ma-ne kìnchat'aàxìn-là ngats'ì kjoa xi tjé tjín xi síkits'ón yijo-ná ko inima-ná, mé-ne tsjeè kitsajnaá nga nguixkon Nainá. Ndaà jchaxkoán Nainá mé-ne nga kjit'aà nachrjein ìsa tsjeè sijchá yijo-ná.

Mé-ne tsja ma-la Pablo kjoa xi s'ín xita Corinto

² Chjoétjò-nájen nga kò inìma-nò. Ngajen, niyá xita xi ch'o nìkò-jen; ni saá yá xita nìkí'on-jen, ni saá jngòò xita chonachan-lajen. ³ K'e nga k'oas'ín tìxan-nò, mìtsà mé kjoa xi ch'o tjín tìhonè-nò; jyeé k'oa kixan-nò nga sa ítjòn, kjit'aá nachrjein nga matsjacha-nòjen, nas'ín kiyá kò tsà titsajnakoaán, kòò inìma-najen nga matsjacha-nòjen. ⁴ Ngui 'én kixí xi tìchjàkò-nò; 'ñó matsja-la inìma-na it'aà tsajòn. 'Nó tjín-na kjojetakòn kò taxki tsjaá ma-la inìma-na, nas'ín tse kjo'in tjín-najen.

⁵ K'e nga j'ì-jen i nangui Macedonia, nìmé xi komà kinikjáya-jen. 'Nó kinikájno-jen; xki xi ján kis'e-najen kjoasì, koa ya ijìin inìma-najen 'ñó kisinchaàxkón. ⁶ Tanga Nainá síjehikon-né xita xi indaà tjín ikon; kisìjehikòn-najen k'e nga j'ì Tito. ⁷ Mìtsà tà koi kjoa-la nga j'ì Tito, jè-né nga jè, tìkoaá tsja tjín-la xi it'aà tsajòn. Tsibénojmi-najen nga jñò, 'ñó mejèn-nò nga jchaxkon-nájen. K'oaá tì kitsò-najen nga ba titsajnaà koa makájno-nò it'aà ts'an. K'e nga ki'nchrè 'én koi, 'an, isaá ndaà kjòtsja-na.

⁸ Jñò, nas'ín tà kjoaba tsohotsji-nò k'e nga kisikasén ítjòn-nò xojòn, i'ndeì, mì tì kù tìsikájno-na. Nga sa ítjòn kisikájnoa nga kisikasén jngòò-nò xojòn, koií kjoa-la nga kisibaá chiba nachrjein-nò. ⁹ Tanga i'ndeì, matsja-la inìma-na, mìtsà koi nga kjoaba kis'e-nò kjoa ts'e xojòn, koi-né nga it'aà ts'e Nainá kinikájno jé-nò nga mì tì jé chìnchaàtsji-nò. Jñò, k'oaá s'ín kjòba-nò koni s'ín mejèn-la Nainá. K'oaá ma-ne nga nìmé kjoa ch'o kisakò-nò it'aà tsajen. ¹⁰ Jè kjoaba xi s'e-ná koni s'ín mejèn-la Nainá, jè síxájiin inìma-ná

nga nìkájnoaá jé-ná nga mì tì jé binchaàtsji-ná mé-ne nga koma kitjokájñaá kjo'in; kò mìtsà mé xi iskan sikájnoaá. Tanga jé kjoaba xi tsjá-ná isò'nde nga mìkiì mokjeiín-ná it'aà ts'e Nainá, jé sixájiin injima-ná nga kjoa biyaà fikò-ná. ¹¹ Tanga tikítsjeèn ngats'iì kjondaà xi ki'nè ta koi kjoa-la nga kjoaba kisakò-nò it'aà ts'e Nainá. I'ndeì titsajnaandaà-nò nga s'een kjoa xi tjínè-nò nga sikítasòn; k'oaá s'ín titsahokoò yijo-nò nga nìmé jé tjín-nò; majticha-nò kjoa ts'e jé; i'ndeì tsakjoòn-chaà Nainá; mejèn-nò nga jchaxkon-ná; makájnoó-nò it'aà ts'an; k'oaá komà-ne nga kits'iì-là kjo'in jè xita xi tsohòtsji jé. Ngats'iì kjoa koi koni s'ín ki'nè, k'oaá s'ín 'ya-la nga mìtsà ngats'ioò tjín-nò jé. ¹² An, koni s'ín kiskii-nò xojoñ carta xi kisikasén-nò, mìtsà jé tìsikítsjeèn it'aà ts'e xita xi tsohòtsji jé; nì mìtsà it'aà ts'e xita xi kitsi'on kisikasén-nò xojoñ. Jè-né nga tijñò ki'ya-nò nga nguixkòn Nainá nga kixií kjoa nga tjòcha 'ya-nájen. ¹³ Maje takòn-nájen ngats'iì kjoa xi ki'nè.

Mìtsà ta koií kjoa-la nga maje takòn-jen it'aà ts'e kjoa koi; isa 'ñó matsja-najen nga ki'ya-jen Tito nga 'ñó tsja tjín-la, koií kjoa-la nga ngats'ioò kinìtsjakoo. ¹⁴ An, jyeé kòs'ín ndaà kisikítsajna-nò nga nguixkòn Tito koni kixan-la. Jñò, nìmé kjoa tjín xi ch'o kinìkíjna-ná. Koni s'ín nga ngats'iì 'én xi ki'mì-nòjen, nguì 'én kixi-né, k'oaá tìs'ín kixi itjo koni tsò 'én xi kixan-la Tito nga ndaà kisikítsajna-nò. ¹⁵ Tito, isaá 'ñó ndaà matsjakeè-nò k'e nga bìtsjeèn-la nga ngats'ioò ndaà kinìkitasòn-là kò ndaà kichjoétjò k'e nga ijchòkon-nò, koa 'ñó ndaà kiyaxkón. ¹⁶ I'ndeì, it'aà tsajòn ma'ñót'aà

takoàn n̄it̄a mé kjoa-ne, k'oaá ma-ne nga matsja-la in̄ima-na.

8

Mé kjoa-ne nga ton maxkó-ne

¹ Ndí 'ndsè k̄o tichjaá, mejèn-na nga k̄atasijiìn-nò k̄jondaà-la Nainá xi okó ij̄iìn naxandá-la Cristo xi t̄ítsajna ya nangui Macedonia. ² Nas'ín 'ñó tse k̄j̄o'in nchihotojiìn t̄ikoa tí'ya-la nga 'ñó matsja-la. Nas'ín 'ñó x̄ita ima, j̄ñà tsojmì xi tsjá k̄jotjò-la Nainá, koó in̄ima-la tsjá koni tsà 'ñó x̄ita nchíná. ³ 'An, t̄ibe-ná nga koó k̄jotsja-la tsjá ton xi k̄jotjò ts'e Nainá koni k̄ji bijchó nga'ñó-la, saà k'oaá skanda tsjásòn-né koni k̄ji bijchó nga'ñó-la. ⁴ J̄ñà x̄ita koi, 'ñó tsibítsi'ba-najen nga mejèn-la nga t̄ikoa s̄iikasén-la ton k̄jotjò j̄ñà x̄ita naxandá-la Cristo jè ì'nde ñánda kochjeén-la. ⁵ J̄ñà x̄ita koi, isaá tsato kitsjaà koni s'ín t̄itsachiñá-lajen. Ítjòn nangui kisikítsajna-la Nainá in̄ima-la, ikjoàn, k'oaá ti s'ín kis'iìn it'aà tsajen koni s'ín mejèn-la Nainá. ⁶ K'oaá ma-ne b̄ítsi'ba-lajen Tito koni s'ín tsibítsi'iāko xá xi kitjoé-la k'e nga sa ítjòn, k'oaá t̄is'ín k̄atasík̄jehet'aà-ne nga k̄atíxkó ton k̄jotjò xi j̄ñò 'bioò. ⁷ Tanga j̄ñò, 'ñó ndaà 'nè-nò ngats'ìi kjoa xi 'nè nga ndaà mokjeiín-nò, nga ndaà nokjoà, nga ndaà t̄jín-nò kjoa chjine, nga t̄ítsajnandaà nga mejèn-nò s̄ichját'aà n̄it̄a mé kjoa-ne, nga t̄jín-nò kjoatjòcha nga it'aà tsajen komà-nò. Koni s'ín 'nè yije kjoa koi, k'oaá t̄is'ín t̄ikatònè-là jè k̄jotjò xi 'bioò.

⁸ M̄ìtsà k'oaas'ín t̄ixan-nò koni tsà jngoò k̄jotíxoma t̄ítsja-nò. Jè xi mejèn-na nga skoeè a nguì kixií

kjoa nga tjín-nò kjoatjòcha koni s'ín tjín-la xita xi kj'eíí nga titsajnandaà nga tsjá kjotjò-la. ⁹ Jñò, jyeé 'yaà kjondaà-la Jesucristo xi otíxoma-ná. Xita imaá kis'iin yijo-la xi kjondaà tsajòn, nas'ín ts'e yije-né ngats'iì tsojmì xi tjín, mé-ne jñò tjoé-nò kjoa nchiná xi tjín-la.

¹⁰ Tsjaà jngoò-nò kjohítsjeèn it'aà ts'e kjoa jè. Kochjeén-nò nga ndaà sikitasòn koni s'ín tsibìts'iaqoo jè nó xi tsato nga kits'ioò ton xi kjotjò ts'e Nainá. K'oas'ín ki'nè nga kò kjotsja-nò kits'ioò.

¹¹ I'ndeí, tákó k'oaa s'ín t'een koni s'ín tsibìts'iaqoo. K'oaa s'ín tikjehet'aà koni s'ín kjòmejèn-nò nga sa ítjòn. K'oaa kji tjioò koni kji bijchó nga'ñó-nò.

¹² K'e nga jngoò xita xi tijnandaà nga kò inima-la mejèn-la tsjá, k'oaa kji kátatsjá koni kji ma xi s'ín, mìtsà tsato tìnjé-la. Nainá mìtsà tsato síjé koni kji ma xi 'nè.

¹³ Mitsà koi kjoa-la nga kjo'in s'e-nò nga sichját'aà-lá xita xi kj'eíí, jè-né nga ngàsòn ngáya s'e-ná mé xi mochjeén-ná. ¹⁴ I'ndeí, jñà xita koi, tsjìn-la mé xi mochjeén-la, tanga jñò, tjín-nò. K'e nga kj'eíí nachrjein, jñà xita koi, s'eé-la mé xi mochjeén-la, kò jñà kosìko-nò k'e nga jñò tsjìn-nò. K'oaa s'ín ngàsòn ngáya s'e-ná mé xi kochjeén-ná.

¹⁵ K'oaa s'ín tíchja Xojon-la Nainá nga tsò: “Jè xi kjìn tsibíxkó, nímé tsiningui-la, koa jè xi chiba tsibíxkó, nímé kisichjaat'aà-la.”

Kós'ín komà nga kinikasén Tito ján Corinto

¹⁶ Ndaà chjí-la Nainá nga k'oas'ín tsibíjiin inima-la jè Tito nga tikoa kisikájno it'aà tsajòn koni s'ín 'an kisikájnoa. ¹⁷ Kixíí kjoa jè Tito kòkjeíin-la

koni s'ín tsibit'ín-la; tikoá jè, 'ñó mejèn-la nga kiikon-nò; ikoón xi kitsò nga kjikon-nò.

¹⁸ Jè Tito tífiko jngoò 'ndseé xi ndaà síkíjna ngats'iì xítà naxandá-la Cristo xi tjín nítà ñánda-ne; nga jè 'ndseé ndaà chjaya 'én ndaà-la Nainá xi kjoá ts'e Cristo. ¹⁹ Mítsà tà koi kjoá koi, tikoáá jña naxandá-la Cristo jaàjìn jè 'ndseé nga koahjtake-najen nga onguíko-jen ton kjotjò-la Nainá xi ngajen titsabíxkó-jen mé-ne jè Nà'èn-ná jeya kíjna, tikoá skoe jña xítà nga koó inima-najen síchját'aà-lajen xítà. ²⁰ K'oaá ma-ne nga mì yá xítà kichjajno-najen kós'ín kochjeén ton xi tse tímaxkó. ²¹ K'oaá s'ín bìnè-lajen yijo-najen kjoá xi ndaà tjín nga nguixkon Nainá ko tikoá nguixkon xítà.

²² Tito, tikoáá báhjtako ijngoò 'ndsè xi xkì xi ján ki'ya-jen nga 'ñó bìnè-la yijo-la nga kjìn xá ma-la. Tjín kixì-né i'ndeì, isaá ndaà bìnè-la yijo-la nga síchját'aà-nò nga isa ndaà beè takòn-nò. ²³ Jè Tito, amigo ts'an-ná nga 'aán síxáko-na xi kjondaà tsajòn. Jña xítà 'ndseé xi i'nga, jña naxandá-la Cristo xi tjín nangui Macedonia jña kisikasén; nga it'aà ts'e xítà 'ndseé koi, jè Cristo jeya bíjna. ²⁴ Takó-là xítà koi kjoatjòcha xi tjín-nò, takó-là kjondaà xi tjín-nò koni s'ín jye okixan-la jña xítà 'ndseé koi, mé-ne nga skoe-ne jña naxandá-la Cristo xi i'nga nga kixì kjoá.

9

Mochjeén-né nga síchját'aà-lá xítà-la Cristo xi kj'eí

¹ Jè kjoá ts'e nga'ñó xi maxkót'aà-la jña xítà tsjeè-la Nainá xi kochjeén-la jè nga'ñó, mì tì kù

mochjeén-ne nga 'an skiì-ìsa-nò. ² Be-ná nga titsajnandaà nga mejèn-nò sikitasòn. K'oaá xan-la jñà xita xi nangui Macedonia ts'e nga jñò xi Acaya tsajòn, titsajnandaà-nò skanda jè nó xi tsato nga mejèn-nò sikasén nga'ño. K'e nga kii'nchré jñà xita Macedonia koni s'ín titsa'nè, kjin ma-ne xi matsja-la it'aà tsajòn tikoáá kjòtsja-la nga mejèn-la sìichját'aà. ³ Koií xá tsikasén-nò jñà 'ndseé koi, mé-ne 'an mì ch'o kótijna-na tsà koi nachrjein-la tsà ta 'én ndiso koma-ne koni s'ín ndaà síkítsajna-nò it'aà ts'e kjoa koi, mé-ne jñò titsajnandaà koni s'ín kixan. ⁴ Kós'ín koma-ne tsà koi nachrjein-la kjiko i'nga-na xita Macedonia. K'e nga kijchò skoe-nò nga kjeè kii titsajnandaà nga'ño xi sikasén. Tsà k'oas'ín koma kjoa koi, ngajen kosobá-najen, kò jñò, ìsaá 'ño kosobà-anò. Nga ngajen, it'aà tsajòn 'ño ndaà nikítsajna-nòjen. ⁵ Koií kjoa-la k'oaá s'ín tsikítsjeèn nga tsibitsi'ba-la jñà 'ndseé nga kisikasén ítjoàn, mé-ne nga kàtikon-nò koa kàtasíchját'aà-nò nga kàtíxkòko-nò ton kjotjò xi jye k'oas'ín kits'ioò ndsobaa, mé-ne k'e nga jye tíjnandaà kjotjò-nò jcha-la nga ijìin inima-nò inchrobàjìin-ne; mìtsà kjo'ño komà-nò.

⁶ Tikítsjeèn jè 'én xi tsò: Jè xi chiba tsojmì bítje, chibaá tsojmì majchá-la; jè xi tse tsojmì bítje, kjin tsojmì majchá-la. ⁷ Nga jngoò ijngoò, k'oaá kji kàtatsjá koni kji kosòn-la inima-la. Mìtsà kò kjoba-la nga tsjá, nì mìtsà kjo'ño koma-la, nga Nainá tsjakeè-né xi kò kjòtsja-la tsjá. ⁸ Nainá koma-la tsjá yije-nò kjondaà xi tjín-la, mé-ne nga kjit'aà nachrjein s'e yije-nò xi mochjeén-nò,

skanda kininguí-nò mé-ne koma síchját'aà ts'e xá xi ndaà tjín. ⁹ K'oaá s'ín tíchja Xojon-la Nainá nga tsò:

Kisika'bí-la xita ima nga kitsjaà-la mé xi mochjeén-la.

Kjoakixi-la, mìkì kjoehet'aà nita kjé-ne.

¹⁰ Nainá tsjá tje-la tsojmì xi sitje, tikoá tsjá tsojmì xi chineé. Tsjá yije-nò xi mochjeén-nò nga kùtjee; tikoáá síchá tsojmì xi bìtjee. Kjìn skoya kjondaà sakò-nò k'e nga kò kjoakixi-nò 'bioò kjotjò-nò.

¹¹ Jñò, s'e yije-nò ngats'iì kjoá nchiná xi tjín, mé-ne nga kò kjondaà-nò ma síchját'aà-là xita xi kj'eíí, nga sikasén-là kjotjò xi ngajen onguíko-jen. K'e nga tjoé-la jñà xita 'ndseé, tsjá-la kjondaà Nainá.

¹² Jñà tsojmì kjotjò xi titsanikasén-là jñà xita 'ndseé, mìtsà ta koi kjoá-la nga kochját'aà-la mé xi chija-la, tikoá koií-né nga isa kjìn koma xita xi tsjá-la kjondaà Nainá. ¹³ Jñà xita koi, k'e nga tjoé-la tsojmì kjotjò, jeya sùkíjna Nainá. K'oaá s'ín skoe-ne nga kixíí kjoá nga jñò nìkitasòn-nò 'én ndaà-la Nainá xi kjoá ts'e Cristo koni s'ín mokjeiín-nò. Jñà xita koi skoexkón Nainá it'aà ts'e tsojmì kjotjò xi 'biì-là kò xi 'biì-là jñà xita xi kj'eíí. ¹⁴ Koó inima-la kichjät'aà-la Nainá it'aà tsajòn, nga ñó tse kjondaà tísakó-nò xi tsjá-nò Nainá. ¹⁵ jNdaà chjí-la Nainá nga ñó tse kjondaà tsjá-ná, skanda tsjìn-ná 'én kós'ín k'oi-lá kjondaà!

10

Kó tsò Pablo nga chjatjì xá-la nga chí'nda-la ma Cristo

¹ 'An xi Pablo 'mì-na, bìtsi'bà-nò it'aà ts'e Cristo xi tjín-la kjondaà, kò xi indaà tíjna inima-la. Tjín

xita xi tsò-na nga ima kjoa xó s'iaàn k'e nga ya tijnajijn-nò, ko 'ño xó ts'en s'iaàn k'e nga kjiin tijnna. ² Tikoā bitsi'bà-nò k'e nga kjikon-nò, jñò, ítjòn jchibàya-nò kjoa xi tjin-nò, mé-ne k'e nga kijchoa, kì kii bìnè-nájen nga 'ño kichjàkoaa jñà xita xi k'oas'in nchitsò nga k'oaá s'in titsa'nè-jen koni s'in xi taxki xita isò'nde. Tanga 'an, tijnà ndaà-ná nga kojtikooa jñà xita xi chjajno-najen. ³ Kixíi kjoa nga xita isò'nde 'mì-najen, tanga mì k'oas'in bixkán-jen koni s'in kjaán jñà xi taxki xita isò'nde. ⁴ Kicha xi nìkjeén-jen, mìtsà kicha ts'e isò'nde. Nga'ño ts'e Nainá-né xi ma-la síkixòña nga'ño-la xita neii xi bíchjoà ikòn-la 'én-la Nainá. ⁵ Nìkixòña-nájen ngats'iì kjohítsjeèn xi ch'o tjin ko kjoa 'nga takòn xi kondra ts'e kjoachjine-la Nainá. Ndobà'ño-nájen ngats'iì kjohítsjeèn mé-ne koma kitasòn-la Cristo koni s'in mejèn-la. ⁶ Titsajnaandaà-nájen nga k'oi-lajen kjo'in xita nita mé kjoa-ne xi mìkii ndaà bitasòn-la, k'e nga jye jcha-la nga jñò kixi nìkitasòn.

⁷ Jñò, tà k'oaá s'in chitsejèn-là koni s'in 'ya-la jñà xita. Tsà tjin i'nga xita xi tsò-la yijo-la nga jè Cristo kisikasén, ndaà kàtasíkitsjeèn, tikoā ngajen jè sobà Cristo kisikasén-najen. ⁸ Mìkii masobà-na nga ndaà síkijna yijo-na it'aà ts'e kjotixoma xi kisìngatsja-najen Cristo mé-ne koma síchját'aà-nò nga isa 'ño kitsajnaà; ko mìtsà koi-ne nga 'an sikits'ón-jiiin-nò. ⁹ Majin-na nga k'oas'in síkitsjeèn nga 'an mejèn-na binchaxkón-nò k'e nga xojon tìsikasén-nò. ¹⁰ Tjin i'nga xita xi tsò: “Xojon-la, 'ño jchán tjin, 'ño tíchja, tanga k'e nga i tijnajijn-ná mìtsà 'ño xkón kji. 'Én xi chja, mì yá xi ndaà beèxkón.” ¹¹ Jñà xita xi k'oa tsò, ndaà kàtasíkitsjeèn koni

tsò xojoŋ xi ñikasén-jen k'e nga kjiin titsajna-jen. K'oaá tis'ín s'en-jen k'e nga ya titsajnajiiin-nòjen.

¹² Kixíí kjoa, ngajen, majin-najen nga siingásòn-kjoòko-jen jñà xita xi ti yijo-la ndaà síkítsajna-ne. Jñà xita xi k'oas'ín s'ín, xita tòndo-né. Tsjin-la kjohítsjeèn nga ti chiba ts'eé síchiba-ne yijo-la. Tikoá ti xikjín síchibakjoè-ne.

¹³ Ngajen, mikiì síkatonè-lajen chiba-la nga ndaà síkítsajna-jen yijo-najen. K'oaá kji koni kji tsjá chiba Nainá it'aà ts'e xá-najen. Jè Nainá kitsjaà-najen xá xi ijchòko-nòjen skanda ján Corinto. ¹⁴ Ko tsà mì-là ngajen ijchò ítjòn-jen, kixíí kjoa kinikatonè-lajen chiba-la i'nde koni kji kitjò'nde-najen. Tanga ngajen-nájen xi ijchòko ítjòn-nòjen 'én ndaà-la Nainá xi kjoa ts'e Cristo.

¹⁵ Mìtsà jìn ndaà ñíkítsajna-jen yijo-najen it'aà ts'e xá xi nchis'ín xita xi kj'eíí. Mìtsà titsanikatonè-lajen chiba-la koni kji xá xi oko-najen. Chiñàkjoa-nájen, koni s'ín isa 'ñó ndaà kòkjeiín-nò, kò isaá kòtseya xá xi titsa'nè-jen. Tanga ta k'oaá kji sixá-jen koni s'ín tjen chiba-la. ¹⁶ K'oaá s'ín kénójmíya-jen 'én ndaà-la Nainá jñà naxandá xi fi-isa ñánda kijna naxandá tsajòn.

Tanga mì ya kitjás'en-jiiin-jen i'nde ñánda jye nchisíxá xita xi kj'eíí nga mì jìn ndaà síkítsajna-jen yijo-najen xá xi nchis'ín xita xi kj'eíí.

¹⁷ Jè xi jeya síkíjna yijo-la, ta saá Nainá jeya kàtasíkíjna. ¹⁸ Mìtsà jè xi ndaà bitjongui xi ti yijo-la ndaà síkíjna-ne it'aà ts'e mé kjoa xi s'ín. Jè Nainá xi k'oa kitsò tsà kixí kjoa nga ndaà xita.

Pablo, jè xi ngui xita-la Cristo nga jè tsibíxáya-la

1 T'een kjondaà, tiná'ya jngoò tjò-ná; k'oaá s'ín tìchjàkò-nò koni jngoò xita xi mì ndaà tìjna kjohítsjeèn-la. Kàtas'e-nò kjoatsejta. 2 Koni s'ín makájno-la Nainá, 'an, k'oaá tìs'ín makájno-na it'aà tsajòn nga mì kj'eíí xita konguít'aà-là. Ta jngoó x'in tsibìndaàjìin-kò-nò nga siìngatsja-nò, jè Cristo. 'An mejèn-na nga tsjeè siìngatsja-nò Cristo koni jngoò tsòti xongó. 3 Tanga tsakjoòn-ná tsà k'oas'ín komat'ioòn koni komat'in Eva nga kiskoònachan-la jè ye, tsà ya kìts'ón-jìin kjohítsjeèn-nò nga kìnchat'aàxìn-lá jè kjoatjòcha kixi xi tìjn-nò kò Cristo nga mì tì tìjngoò-ne takòn nga onguít'aà-là. 4 Nga bìi'nde-là nga kj'eíí xita bijchókon-nò xi kj'eíí tsò 'én xi okóya-nò it'aà ts'e Jesús koni tsò 'én kixi xi jìn bènojímí-nòjen, kò mokjeiín-nò nga choétjò jngoò inìma xi kj'eíí xi mìtsà jè Inìma Tsjeè-la Nainá xi jye kichjoétjò. Tìkoa, mokjeiín-nò nga kj'eíí tsò 'én ndaà-la Nainá xi kjoa ts'e Cristo xi bènojímí-nò koni tsò xi kòkjeiín-nò nga sa ítjòn. Nga ndaà sasén-nò nga jñà na'yà-là xita koi. 5 'An, mìtsà isa nangui tìjna-la jñà xita xi 'mì-là jñò nga isaá 'nga tìtsajna-la jñà xita xi tsibíxáya-la Cristo. 6 'An, nas'ín mìkìì ndaà ma-na chjà, nìmé kjohítsjeèn chijat'aà-na xi it'aà ts'e 'én-la Nainá. Jñò, jyeé ndaà 'yaà, 'an, nita ñánda nga tìjnaa, k'oaá s'ín tsakoò-nò.

7 ¿A ch'oó kis'iaàn nga tsakoòya-nò 'én ndaà-la Nainá nga nìmé kisikíchjí-nò? Nangui tsohótijnako-nò skanda kisihìma-ná yijo-na mé-ne jñò isa 'nga kisikítsajna-nò. 8 Jñà xita naxandá-la Cristo xi xìn i'nde-la kisìchját'aà-na

nga tsachrjekàjno-là tòn mé-ne komà kisìxáko-nò nga tsibenojmí-nò 'én ndaà-là Nainá xi kjoa ts'e Cristo. ⁹ K'e nga tsohótijnako-nò, niyá xi kisijti-là mé xi kichijàt'aà-na. K'e nga mé tsojmì xi kjòchjeén-na, jñà xità 'ndseé xi j'ii-ne nangui Macedonia kitsjaà-na. Nga majìn-na nga chjá koma-nò. Nàchrjein xi fi-ìsa, tákó k'oaá s'iaàn. ¹⁰ Ngui koó kjoakixi-là Cristo koni tìxan-nò nga mì yá xi kotichjoà-na kóhokji nangui Acaya nga ndaà síkìjna yijo-nà kjoa xi tìs'iaàn nga mì tòn kisijé-nò. ¹¹ ¿Mé-ne k'oa xan-na nga chjá? ¿A koi-né nga mìkii matsjake-nò? Tíbeè Nainá, 'an 'nó matsjake-nò.

¹² Tanga tákó k'oaá s'iaàn koni kisìko-nò nga sa ítjòn nga nímé kisijé-nò mé-ne nga mìkii ts-jaà'nde-là nga kítso jñà xità xi mejèn-là nga jeya síkítsajna yijo-là nga k'oaá tìs'ín nchis'ín koni ngajen. ¹³ Xità koi, xità ndiso-né. Mìtsà kixi kjoa nga xità xi jè Cristo tsibíxáya-là. Ta konachan-né nga síkijatjìya-là yijo-là koni tsà jè Cristo tsibíxáya-là. ¹⁴ Kjoa koi, mìtsà kjoa xitse; tìjè-ne xità neíí síkijatjìya-là yijo-là koni jngoò àkjale-là Nainá xi ote kji. ¹⁵ Mìtsà xkón tjín, xó k'oaá koma-ne nga jñà xità xi síxá-là jè xità neíí, k'oaá s'ín síkijatjìya-là yijo-là koni tsà xità xi bénojmi 'én kixi-là Nainá. Xità koi k'e nga kjoehet'aà nàchrjein-là, k'oaá s'ín komat'in koni s'ín tjín kjoa ch'o xi nchis'ín.

Mé kjoa-ne nga jeya síkìjna yijo-là Pablo

¹⁶ Ijngoò k'a k'oa tìxan-nò, kì k'oaá s'ín nikítsjeèn nga mìkii ndaà tjín kjohítsjeèn-nà. Tsà k'oas'ín síkítsjeèn, tjiì'nde-ná nga 'an, k'oa tìs'ín ndaà síkìjna itsé yijo-nà koni s'ín xità xi i'nga xi mì ndaà tjín

kjohítsjeèn-la. ¹⁷ K'e nga kos'ín tìchjà, mìtsà k'oas'ín chjà koni s'ín sasén-la Na'èn-ná, k'oaá s'ín tìchjà koni jngoò xità xi mì ndaà t́ín kjohítsjeèn-la nga t́'an ndaà síkíjna-na yijo-na. ¹⁸ Koni s'ín kjìn ma xità xi t́ijñà ndaà síkítsajna-ne yijo-la it'aà ts'e kjoa xi s'ín, 'an k'oaá t́is'ín mejèn-na nga t́'an ndaà síkíjna-na yijo-na. ¹⁹ Jñò, bixón-nó nga xità chjine-nò, t́anga, ¿mé-ne bi'nde-là jñà xità xi mì ndaà tsò kjohítsjeèn-la? ²⁰ Jñò, nìkjeín-là xità xi kjo'ñó s'ín-nò nga chi'nda 'nè-là, xità xi ma-la síkjehejno-nò tsojmì xì t́ín-nò, xità xi jñò beètòon-nò, xità xi ochrjekàngui-nò, koa nìkjeín-là xità xi síjts'iin-'a isén-nò. ²¹ Jñò, ¿kó s'ín nìkítsjeèn? ¿A masobà-na nga indaàkjoa kinìko-nòjen nga mì k'oaá s'ín kinìko-nòjen koni kisìko-nò jñà xità xi i'nga?

Tsà t́ín i'nga xi 'ñó ts'en s'ín nga chjà, 'an t́ikoa ts'eén t́is'iaàn koni s'ín 'ñó tìchjàko-nò. T́anga ta k'oaá s'ín tìchjà koni tsà mìkì ndaà t́ín kjohítsjeèn-na.

²² Jñà xità koi, tsà kixi kjoa nga xità hebreo-né, 'an, t́ikoaá xità hebreo-ná. Tsà xità Israel-né, 'an, t́ikoaá xità Israel-ná. Tsà t́je-la Abraham-né, 'an, t́ikoaá t́je-la Abraham-ná. ²³ ¿A chi'nda-la Cristo-né? 'An, isaá ndaà síxá-la Cristo. (K'e nga kos'ín chjà, k'oaá ngaya-la koni jngoò xità xi mìkì ndaà t́ín kjohítsjeèn-la.) 'An isaá 'ñó síxá-la. Isaá ko kjìn k'a ótijnaya ndayá, isa ko kjìn k'a síki'on-na xità, t́ikoa ko kjìn k'a nga jye kjomeè sík'en-na xità. ²⁴ Jñà xità judío, 'òn k'a kitsjaà-na kjo'in nga tsakajá-na xox'ín xi s'e-la kohòyo xi kaàn chrj'oòn ñijòn t́ín-ne nga jngoò ñjngoò k'a. ²⁵ Jàn

k'a kits'iin-na kjo'in nga tsajá-na xkajnchra jña xita; jngoò k'a tsibínè-na ndajo xita nga mejèn-la sikk'en-na; jàn k'a kiskaàjìin-ndáko-na chitso ya jjiin ndáchikon; jngoò nàchrjein ko jngoò nìtjen tsohótijnajñaà jjiin ndáchikon. ²⁶ Nita ñánda nga ojmeè, ta kjojkón tjin kjit'aà-la. Tjin kjojkón ya xajngá nandá ñánda nga otoa. Tjin kjojkón ts'e xita chijé. Tjin kjojkón it'aà ts'e xita xinguiáa judío koa tjin it'aà ts'e xita xi mìtsà xita judío. Tjin kjojkón ya jjiin naxandá, koa ya i'nde it'aà xìn ñánda tsjin xita. Tjin kjojkón ya jjiin ndáchikon, koa ya jjiin-la xita xi tsò nga xita-la Cristo ma tanga mìtsà kixi kjoa. ²⁷ Kjin jchán xá kisinè-na xi 'ño tjin, sà k'oaá skanda mìkìi ójnafè. Kisikjiaán kjinchrá. Sà k'oaá tsjin-na nandá xi ma 'yò, sà k'oaá skanda mìkìi tsoókjeen, kisikjiaán 'nchán nga tsjin-na nikje xi ójnakjá.

²⁸ Mìtsà tà jña kjoa koi xi komàt'ian. Tjin isa xi kj'eíi xi isa 'ño tjin. Nàchrjein nchijòn makájno-na kjoa xi tímat'in kóhótjin naxandá-la Cristo xi 'an sikinda. ²⁹ Tsà yá 'ndseé xi ma indaàjìin, tikoáá 'an, ma indaàjìin-ná. Tsà yá xi mejèn-la ótsji jé-la jngoò xita xi kj'eíi, 'an ma jtike-ná. ³⁰ Tsà mochjeén nga ti yijo-na ndaà síkijna-na, jè ndaà síkijna yijo-na it'aà ts'e kjoa xi mahindaàjñaà. ³¹ Jè Nainá xi Na'èn-la Jesucristo xi otíxoma-ná, jeya kàtijna nita kjé-ne, tíbeè-ne nga 'én kixíi xi tìchjà. ³² K'e nga tsohótijna ján naxandá Damasco, jè xita xi gubernador tjina nga jè kitsjaà-la xá jè xitaxá itjòn xi 'mì Aretas, kitsjaà-la okixi nga kisikinda xotjoa-la naxandá nga mejèn-la tsobà'ño-na. ³³ Tanga jña xita kisichját'aà-na nga kisikijnaya-na nisiyá, ikjoàn

ya tsachrje-na ñánda tix'á chrjó ndajo xi tjíndi-la naxandá nga kiskinjén-t'aà-na skanda it'aà nan-gui. K'oaá s'ín komà-ne nga mìkì komà kit-sobà'ño-na.

12

Pablo, kits'ù jngoò-la nijná xi kixi kjoa

¹ Nímé xi sikhjé nga ndaà síkíjna yijo-na. Tanga mochjeén-né nga k'oa xán-nò kjoa xi tsakó-na Nainá k'e nga tsohókò-na, jè kjoa xi Nainá kisikichiya-na. ² Beèxkon-ná jngoò xita xi fit'aà-la Cristo. Tjín-la te ñijòn nó nga kùkò Cristo skanda jè ngajmì xi ma-ne jàn [ñánda tíjna Nainá]. Mìkì be tsà k'oaá s'ín kùkò nga yijo, a xi tà inímaá kùkò. Jè Nainá tíjìn-la. ³ Tanga be-ná nga jè xita jè, kù. A yijo-né, o a tà inímaá kù, tà jngoò Nainá tíbeè. ⁴ Kù skanda ján j'nde ñánda ndaà jchán choòn ján ngajmì ñánda tíjna Nainá. Kù'nchré 'én xi 'ño xkón tjín, xi nijngoò xita koma s'enojmí-la. ⁵ Koni komàt'in xita jè, jè-né xi ok'in-la nga ndaà kína. Tanga it'aà ts'an mìkì ok'in-na nga 'an ndaà síkíjna yijo-na. Tajngoò tsà jña kjoa xi mahindaàjñaà ndaà síkíjna. ⁶ Tsà ndaà síkíjna yijo-na [koni tjín kjoa xi 'an kijtseè ngajmì], mìtsà 'én ská benojmiá, 'én kixí chjà. Tanga majìn-na nga ndaà síkíjna yijo-na it'aà ts'e kjoa xi kijtseè mé-ne nga nijngoò xita isa 'nga síkíjna-na ta ngatjì-la kjoa koi. Kos'ín kàtasíkínda-na kó s'iaàn, kó s'ín chjà, kò kó s'ín tìsìchá yijo-na.

⁷ Mé-ne nga mì 'an ndaà kótijna-na it'aà ts'e kjoa xi 'an tsakó-na Nainá xi jeya jchán tjín, kiskaàt'aà jngoò-na ch'in, k'oaá ngaya-la koni tsà na'yá

nchajiin yijo-na. Jè xita neíj kijtseètòon-na nga kisikasén-na kjo'in. ⁸ Kò jàn k'a bítisi'ba-la Na'èn-ná nga kàtjaàxìn-na kjo'in jè. ⁹ Tanga jè Nainá ta k'oaá tsò-na: “Jè kjondaà-na yaá tíjnakò-lè. Yaá okoaà yije nga'ño-na k'e nga tsjin-lè nga'ño.” K'oaá ma-ne jè kjoa xi mahindaàjñaà, jè xi ndaà síkijna-na yijo-na, mé-ne nga jè nga'ño-la Cristo kíjnakò-na. ¹⁰ Koií kjoa-la matsja-na k'e nga ma indaàjñaà. Tíkooá matsja-na k'e nga chja'on-kò-na xita, k'e nga mé tsojmì xi chija-na, k'e nga fitjingui kondra-na xita, k'e nga mé kjoa xi 'ín ma-na síkjiaán j't'aa ts'e Cristo. K'e nga ma indaàjñaà, k'eé isa ndaà s'e-la nga'ño inima-na [nga jè Cristo tsjá-na].

¹¹ 'An, k'oaá s'ín kichjà, koni s'ín chja xita 'én xi nimé chjí-la. Tanga jño ki'nè-ná kjo'ño. Jño xi tjínè-nò nga ndaà síkijna-ná. Nga 'an mìtsà isa nangui tijnà-la jña xita xi 'mì-là jño nga isa 'nga títsajna-la jña xita xi tsibíxáya-la Cristo; nas'ín 'an nimé chjí-na. ¹² K'e nga tsohótijnakò-nò kis'e-na kjoatsejta nga tsakoò-nò kjoaxkón xi okó chiba kò xi okó kjoa jeya-la Nainá kò nga'ño-la. Kjoa koi okó nga kixi kjoa nga 'an-ná xi tsibíxáya-na Cristo. ¹³ ¿Jño, mé xi isa nangui kisikítsajna-nò koni jña naxandá-la Cristo xi kjeí? ¿A koií majti-nò nga mì jño kisijti-nò k'e nga mé tsojmì xi kichjàt'aà-na? Tijchàat'aà-ná nga nimé kisijé-nò.

Kó kitsò Pablo nga ijngòò k'a tífikon jña xita Corinto

¹⁴ Jyeé tijnandaà xi ma-ne jàn k'a nga kjíkon-nò. Táko k'oas'ín s'iaàn, mìtsà mé xi sijé-nò. Mìtsà koi otsjià mé tsojmì xi tjín-nò; kjondaà tsajòn xi otsjià. Nga jña xita jchínga tjínè-la nga koiitjò ton

xi kochjeén-la ixti, mìtsà jñà ixti tjínè-la nga koìtjò ton xi kochjeén-la xita jchínga. ¹⁵ Matsjaá-na nga sikjèya yije mé xi tjín-na, skanda tìsikjè yijo-na kjoa ts'e inìma-nò. Nga ìsa ndaà matsjake-nò, jñò, ¿a ìsaá chiba matsjacha-ná?

¹⁶ Kixí kjoa, 'an, nímé tsojmì xi kisìjé-nò. Tanga tjín i'nga xita xi tsò: “Ñó maña nga konachan-la xita.” ¹⁷ Tanga, ¿mé xi kiskoònachan-nò k'e nga kisikasén i'nga-nò xita? ¹⁸ Tsibítisi'ba-la Tito nga kiikon-nò kò jè 'ndsè xi ìjngò. Jè Tito, ¿a kiskoònachaán-nò? ¿A mìtsà ngàsòn tìkoi-ne kjohítsjeèn tjaàjìn-jèn, tìkoa tìkoi-ne ndiyá kixi tjaàya-jèn?

¹⁹ ¿A k'oaá s'ín nìkítsjeèn nga yijo-najèn tìtsanokjoàtji-jèn? Majìn, tíbeè Nainá koi 'én xi tìtsanokjoà-jèn nga Cristo tìtsajnakò-jèn. Jñò ndí 'ndsè xi 'ñó matsjake-nò, ngats'ì kjoa koi, kjondaà tsajòn-nò nga ìsa tse ngañó kátas'e-nò. ²⁰ Makájno-na tsà k'e nga kijchokon-nò tsà mì k'oaá s'ín tìtsa'nè koni s'ín mejèn-na. Koa 'an tsà mì k'oa s'ín tìs'iaàn koni s'ín mejèn-nò jñò. Koií makájno-na tsà koií nachrjein-la tìtsabixkàn-kjoò, tsà kjoaxìtakòn tjín-nò, tsà kjoajti tìjìn inìma-nò, tsà jò tsà jàn ya tìtsajna-là xinguiò, tsà 'én ndiso tìtsabìnè-là xinguiò, tsà xinguiò tìtsanokjoájno-lá, tsà 'nga takòn tìtsa'nè kò tsà mìkì ndaà tìtsajnakò xinguiò nga jngò ìjngò. ²¹ Tìkoaá makájnoó-na k'e nga kijchokon ìjngò k'a-nò tsà Nainá s'ìsobà-na nga nguixkoòn jñò. Tsà Nainá s'ìkjindáya-na xi kjoa tsajòn nga kjìn ma-nò xi jye kjòtseé binchaàtsjioò jé nga mìkì nìkájno jé-nò kjoa tjé xi 'nè kò kjoa chijngui xi 'nè

ko ngats'ìi kjoa ch'o xi 'nè.

13

'Én-la Pablo xi fehet'aà-ne.

¹ Jè xi ma-ne jàn k'a nga kjíkon-nò. K'oaá s'ín tíchja Xojon-la Nainá nga tsò: “K'e nga tsà jngoò xitá mejèn-la kíindaàjìin jngoò kjoa, jò kò tsà jàn xitá kochjeén xi koma tsjá 'én nga xkon kijtseè-ne kjoa xi komà mé-ne nga jcha-la, a kixíí kjoa, o xi majìn-né.” ² K'oaá s'ín jye kixan kixi-nò k'e nga ijchòkon-nò xi ma-ne jò k'a, kò i'ndeí nas'ín kjìin tìjnaa, k'oaá tì xan ìjngoò k'a-nò nga jñà xi jé tsohòtsji nga sa ítjòn kò xi nchihòtsji jé skanda i'ndeí, mikìi kojno-la nga tsjaà-la kjo'íin nga jngoò ìjngoò. ³ An, k'oaá s'iaàn mé-nè nga jcha-nò, a kixíí kjoa nga 'an síkjeén-na Cristo nga chjàjìin-nò 'én-la. Mìtsà indaàkjoa Cristo; tjin-la nga'ño k'e nga síxájìin inìma-nò. ⁴ Kixíí kjoa jè Cristo, k'oaá s'ín k'en-t'aà krò koni jngoò xitá xi tsjìn-la nga'ño. Tanga i'ndeí, nga'ño ts'e Nainá tìjnakon-ne. Ngajen, k'oaá tìs'ín indaàkjoa tìtsajna-jen koni s'ín komàt'in Cristo, tanga nga'ño ts'e Nainá kìtsajnakon-najen koni Cristo mé-ne nga koma síxá-nòjen.

⁵ Jñò, chít'aà inìma-nò, tsà kixíí kjoa nga ndaà mokjeiín-nò it'aà ts'e Nainá. Ndaà chít'aà inìma-nò xi tìjñò-nò. ¿A mìtsà tìjìin-nò nga Cristo tìjnajìin inìma-nò? Ta jngoò-la tsà mìkìi tsatojioòn koni s'ín kichìt'aà-nò. ⁶ Tanga 'an, majngoò takoàn nga jchaá it'aà tsajen, ngajen tsatojìin yije-najen koni s'ín kichìt'aà-najen. ⁷ Koií kjoa-la bítsi'ba-lajen Nainá nga nímé jé kìnchátsjioò. Tanga mìtsà koi-ne nga jcha-najen nga ndaà

bitjo-jen k'e nga chit'aà-najen. Jè-né nga síkitasòn jñò kjoa xi ndaà tjín, nas'ín k'oas'ín kàta'ya-la it'aà tsajen koni tsà mìkii chíkjoa-najen kjoa xi otojìin-jen. ⁸ Mikiì koma kondra kitsajna-lajen xita xi síkitasòn kjoakixi-la Nainá. Ta saá k'oi-lajen nga'ño. ⁹ Matsja-najen k'e nga jñò tjín-nò nga'ño, nas'ín ngajen ma indaàjìin-jen. K'oaá ma-ne nga bitsi'bà-lajen Nainá, mé-ne jñò nimé kjohítsjeèn chijat'aà-nò. ¹⁰ Tikjiì-nò xojon jè k'e nga tákó kjìin tijnaa-isa, mé-ne k'e nga kichokon-nò mì ti k'oaá s'ín 'ño kichjàkò-nò koni s'ín tjín kjotíxoma xi kitsjaà-na Nainá. Nga Nainá mìtsà koi xá kitsjaà-na kjotíxoma nga 'an síkits'ón-jìin-nò, jè-né nga isa kixi kitsajnakoo 'én xi mokjeiín-nò.

Kó kitsò Pablo nga síhixat'aà xita Corinto

¹¹ Ndí 'ndsè kò tichjaá, jè xi fehet'aà-ne, tsja t'è-là inìma-nò; kixi tìtsajna; tìjetakòn xinguiò; tà jngoò kjohítsjeèn kàtas'e-nò, 'nchán tìtsajnakoo xinguiò. Nainá xi tjín-la kjoa 'nchán kò xi tjín-la kjoatjòcha kàtìjnakò-nò. ¹² Nga nguì koo inìma-nò tìixat'aà xinguiò nga jngoò ijngoò. ¹³ Ngats'iì xita-la Nainá xi i tìtsajnakò-na síhixat'aà-nò.

¹⁴ Jè kjondaà-la Jesucristo xi otíxoma-ná, kò kjoatjòcha-la Nainá, kò Inìma Tsjeè-la Nainá kàtìjnakò-nò ngats'ioò. K'oaá s'ín kàtama.

'Én-lá Nainá xi kjoa ts'e Jesucristo
New Testament in Mazatec, San Jerónimo Tecóatl
Mazateco de S Jeronimo Tecoatl; maa
(MX:maa:Mazatec, San Jerónimo Tecóatl)

copyright © 2013 Wycliffe Bible Translators, Inc.

Language: Mazatec, San Jerónimo Tecóatl

Translation by: Wycliffe Bible Translators, Inc.

Mazateco, San Jerónimo Tecóatl [maa], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, San Jerónimo Tecóatl

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 13 Jul 2024 from source files
dated 29 Jan 2022

9f778253-d34e-5037-af35-7bca16479aa0